

Il mas-chalch da Sent



Publicaziuns officialas. Cumpara segund bsögn.
2009/2011
no. 37

7554 Sent, 27 schner 2011 / bmr

Annulaziun da la zona da planisaziun a regard la promoziun da la fabrica d'abitaziuns principalas e la direcziun da la fabrica da segundas abitaziuns

Als 11 mai 2009 ha publichà e decis il cumün da Sent üna zona da planisaziun in vista a la revisiun totala da la planisaziun locala. Quella ha il böt

1. d'adattar l'uorden fundamental a las novas ledschas e planisaziuns surordinadas,
2. da promover la fabrica d'abitaziuns principalas e da limitar la fabrica da segundas abitaziuns, e quai in tuot las zonas da fabrica sco eir i'ls territoris da Zuort e Sinestra, sco eir
3. d'examinar l'uorden fundamental i'l territori da Fora da Büz.

Il sböz da la ledscha a regard la promoziun da la fabrica d'abitaziuns principalas e la direcziun da la fabrica da segundas abitaziuns es gnüda refüsada da la cumünanza d'urna als 28 november 2010. Illa sezzüda dals 10 schner 2011 ha il Cussagl cumünal decis d'annullar la zona da planisaziun (concretisada als 11 favrer 2010) per quai chi pertocca la promoziun da la fabrica d'abitaziuns principalas e la direcziun da la fabrica da segundas abitaziuns. Il Cussagl cumünal as resalva, tgnond suot ögl il svilup effectiv e resguardond il plan directiv chantunal ed il plan directiv regional chi'd es pel mumaint in elavuraziun, da relaschar tenor bsögn darcheu üna zona da planisaziun correspondententa. Pro'ls ulteriurs puncts (alineia 1 puncts 1 e 3) nu daja ingüens müdamaints da la zona da planisaziun in vigur.

Sent, ils 27 schner 2011

Il Cussagl cumünal

Alarm da prouva dals 2 favrer 2011 a las 13.30 h ed a las 14.00 h.

„Allgemeiner Alarm und Wasseralarm“

(Comunicaziun da pressa)

Sco minch'on ha lö in marcurdi, als 2 favrer 2011, a las 13.30 e a las 14.00 ün alarm da prouva in tuot la Svizra.

Pro l'alarm da prouva vegna examinà scha las sirenas funcziunan. Cun quellas vain la populaziun alarmada in ün cas dad ün privel imnatschand. Il signal „**alarm general**“ vain dat d'ün tun üerlond regular chi crescha e chala e chi düra ca. üna minuta.

A las 14.00 vain fat danouvmaing ün alarm da prova ingio chi vegnan examinadas las funcziuns da las sirenas da l'aua. Il signal „**alarm d'aua**“ vain dat d'ün tun bass regularmaing chi düra ca. ses minutas cun interrupziuns.

L'uffizi da militar e da protecziun civila giavüscha d'incleger las inconvenienzas colliadas culla controlla da las sirenas.

Uffizi per la protecziun civila

Müdamaints da la ledscha d'energia chantunala

Daspö ils 1. schner 2011 es in vigur la nouva ledscha d'energia chantunala. Quella ledscha regla il standard energetic da construcziuns ed installaziuns pro edifizis. In conguai culla ledscha veglia haja dat blers müdamaints essenzials. Tanter oter sun quai:

- Pretaisas plü otas a la qualità da la vetta exteriura (reducziun da fin 40% pro l'adöver d'energia), quai vuol dir per stabilimaints novs plü o main il standard da minergia da fin uossa.
- Pretaisas plü otas a la qualità da las installaziuns tecnicas d'ün edifizis
- Max. 80% da l'energia per s-chodar (locals ed aua) das-cha esser energia na regenerabla.
- S-chodamaints dad öli p.ex. das-chan gnir installats be amo in cumbinaziun cun ün sistem d'energia regenerabla e/o cun masüras d'efficienza supplementaras.
- S-chodamaints electric directs (s-chodamaints da resistenza) sco eir s-chodamaints electric supplementars nu sun plü admiss
- Boilers electric nu das-chan plü gnir installats
- S-chodamaints cun accumulatuors electric central cun scumpart dad aua nu das-chan plü gnir rimplazzats
- S-chodamaints a l'exteriur sun be admiss schi vegnan gestits cun energia regenerabla
- etc.

Las prescripziuns novas d'energia vaglian per tuot ils intents da fabrica a partir dals 1. schner 2011. Decisiva es la data d'entrada da la dumonda da fabrica. Infuormaziuns plü detagliadas as chatta sülla pagina d'internet <http://www.endk.ch> . Sanaziuns energeticas vegnan dal rest sustgnüdas finanzialmaing dal Chantun Grischun. Detagls davart ils programs da sustegn as chatta suot www.aev.gr.ch /Energieeffizienz / Fördergelder.

La cumischiun da fabrica

Ledscha da pulizia

La ledscha da pulizia es gnüda acceptada da la cumünanza d'urna als 24 october 2010. D'incuort ha il Chantun fat bun l'uorden da multas disciplinas (Ordnungsbussenverordnung der Gemeinde Sent) il qual es gnü coordinà cun cumüns vaschins. Quel regla tanter oter il gener e l'otezza dals chastis. Illa sezzüda dals 24 schner 2011 ha il Cussagl cumünal fat bun quist uorden. Uschè cha la pulizia chantunala po applichar a partir da subit l'uorden manzunà survat e la nouva ledscha da pulizia. La ledscha da pulizia e l'uorden da multas disciplinas po gnir retrat sün büro cumünal.

Il Cussagl Cumünal

Giantar cumünaivel

Nos giantar da cumpagnia ha lö als 17 favrer 2011 a las 12.00 h illa chasa cumünala Misoch. Prelecziun e musica cun duonna Leta Mosca. Annunzchar pro Erica Clalüna, tel. 081 864 07 59. Sperond sün üna bella cumpagnia.

La corporaziun evangelica